



## **Communicaziun dal 13 da mars 2020, 15.30 uras**

### **cuss. gov. Dr. Jon Domenic Parolini**

#### **Sectur da la scola populara**

Tut las scolas popularas dal chantun Grischun vegnan serradas a partir dals 16 da mars 2020, 06.00 uras fin ad interim. Per la perioda dals 16 da mars 2020 fin ils 30 da mars 2020 na datti nagins pensums per las scolaras ed ils scolars. Surtut n'è betg previs "distance-learning" durant quest temp.

Il champ administrativ da las scolas, en emprima lingia la garanzia da la communicaziun cun las persunas d'instrucziun e cun las persunas responsablas per l'educaziun, sto vegnir mantegnì. Las mesiras da protecziun e prevenziun da l'Uffizi federal da sanadad publica ston en quest connex vegnir respectadas.

Il Departament d'educaziun, cultura e protecziun da l'ambient (DECA) vegn a communitgar ad uras, tge directivas pertutgant pensums, "distance-learning" etc. che valan suenter questa perioda per la scola populara.

Ils purtaders da scola èn supplitgads – ensemen cun las persunas d'instrucziun – d'iniziar ponderaziuns preventivas correspondentas areguard il manaschi da scola. Las direcziuns da scola pon drizzar dumondas che pertutgan specificamain il manaschi da scola als inspecturats districtuals.

Per famiglias che n'han betg in'otra pussaivladad da surveglianza che tat e tatta, ston ils purtaders da scola porscher a partir dals 16-03-2020 enfin ils 20-03-2020 ina tgira d'uffants complementara a la scola. Igl è obligant per quels geniturs/quellas persunas responsablas per l'educaziun da s'annunziar anticipadamain tar il purtader da scola correspondent. Dumondas en quest connex èn da sclerir cun l'inspecturat da scola responsabel.

#### **Scola postobligatorica**

L'instrucziun da preschientscha en las scolas postobligatoricas (sectur scolas medias, furmaziun professiunala superiura, scolas autas, scolas professiunalas, soluziuns transitoricas e curs ordaifer il manaschi) vegn sistida a partir dals 16 da

mars 2020, 06.00 uras e midada en furmas d'instrucziun digitalas, nua che quai è pussaivel. La direcziun da scola sto vinavant garantir la direcziun pedagogica ed administrativa. La furma d'instrucziun "distance-learning" succeda ad interim. Ils lavuratori d'empredissadi vegnan serrads ad interim. Nua ch'ils manaschis da producziun ston vegnir manads vinavant, pon emprendistas/ emprendists vegnir engaschads vinavant.

En il champ da las scolas medias, da la furmaziun professiunala superiura e da las scolas autas èn ils purschiders da furmaziun dal Grischun en ina buna posiziun: Furmas d'instrucziun alternativas sco «distance-learning» u «blended-learning» vegnan gia applitgadas en differents formats. Las instituziuns da furmaziun en la scolaziun professiunala da basa (scolas professiunalas, soluziuns transitoricas e curs ordaifer il manaschi) èn posiziunadas differentamain areguard las furmas alternativas. L'intermediaziun dals moduls dals curs ordaifer il manaschi cun "distance-learning" è mo pussaivla cun restricziuns.

Ils purschiders da furmaziun infurmeschan scolaras e scolaras, emprendistas ed emprendists, studentas e students, persunas d'instrucziun, docentas e docents davart l'ulteriur proceder sin il champ da scola via ils chanals d'infurmaziun da la scola. La finamira è da manar vinavant il manaschi da scola, era sut circumstanzas engrevgiantas e pussibilitar in success d'emprender optimal.

Il champ administrativ da las scolas sco manaschi, servetschs e perscrutaziun cuntinueschan. Ils manaschis d'abitar e mangiar vegnan manads vinavant, là nua che necessari e pussaivel. Las mesiras da protecziun e prevenziun da l'Uffizi federal da sanadad publica ston vegnir respectadas.